

# Siusinaartumik pensionisiat pillugit Inatsisartut inatsisaat pillugu Namminersorlutik Oqartussat inatsimmik nalunaarutaat

Matumuuna siusinaartumik pensionisiat pillugit Inatsisartut inatsisaat nr. 40, 9. decemberi 2015-meersoq, Inatsisartut inatsisaat nr. 19, 28. november 2016-meersumi, Inatsisartut inatsisaat nr. 40, 23. november 2017-meersumi, Inatsisartut inatsisaat nr. 6, 27. november 2018-meersumi, Inatsisartut inatsisaat nr. 28, 28. november 2019-meersumi, Inatsisartut inatsisaat nr. 6, 19. november 2020-meersumi, Inatsisartut inatsisaat nr. 7, 19. november 2021-meersumi, Inatsisartut inatsisaat nr. 9, 20. juni 2022-meersumi, Inatsisartut inatsisaat nr. 18, 21. november 2022-meersumi, Inatsisartut inatsisaat nr. 36, 13. juni 2023-meersumi, Inatsisartut inatsisaat nr. 70, 20. november 2023-meersumi aamma Inatsisartut inatsisaat nr. 55, 25. november 2024-meersumi allannguutit ilanngullugit, nalunaarutigineqarpoq.

## Kapitali 1

### *Aalajangersakkat nalinginnaasut il.il.*

§ 1. Siusinaartumik pensionisianik pisartagaqarnissamut pisinnaatitaanermut, qinnuteqartup danskisut innuttaassuseqarnissaa piumasaqaataavoq.

*Imm. 2.* Tamatumanili atuutinngilaq:

- 1) Inunnut Isumaginninnikkut isumannaallisaaneq pillugu Nunat Avannarliit isumaqatigiissutaanni pineqartunut, imaluunniit
- 2) Inunnut qinnuteqarneq sioqqutilaarlu siviinnerpaamik ukiuni pingasuni Kalaallit Nunaanni aalajangersimasumik najugaqarsimasunut.

§ 2. Siusinaartumik pensionisiaqalerniarnermut piumasaqaataavoq, qinnuteqartup Kalaallit Nunaanni, Nunat Avannarliit arlaanni imaluunniit nunami EØS-ip isumaqatigiissutaanik akuersisimasumi aalajangersimasumik najugaqartuunissaa.

§ 3. Siusinaartumik pensionisiaqalernissamut piumasaqaataavoq, 15-inik ukioqalernermiit aammalu maleruagassat atuuttut toqqammavigalugit utoqqalinermit pensionisiaqalernermiit siviinnerpaamik ukiuni pingasuni Kalaallit Nunaanni, Danmarkimi Savalimmiuniluunniit aalajangersimasumik najugaqarsimanissaq.

§ 4. Inatsisartut inatsisaanni matumani aapparisaq naatsorsuunneqartoq tassaavoq siusinaartumik pensionisiaqartup katissimallugu aapparisa, nalunaarsukkamik aapparisa, imaluunniit katissimanermut

assingusumik sivikinnerpaamik ukiumi ataatsimi aapparimasaa.

*Imm. 2.* Aappaasoq isumaginninnerup iluani ulloq unnuarlu angerlarsimaffimmut aaliangersimasumik najugalittut nuuppat, siusinaartumik pensionisiaqartoq kisimiittutut isigineqassaaq.

## Kapitali 2

### *Pisartagalersinnaaneq katersisarnerlu*

**§ 5.** Inuit 18-inik ukioqalersimasut taamaattorli sulisinnaassutsimikkut timikkut tarnikkulluunniit innarlerneqarsimasut, siusinaartumik pensionisianik pisartagaqalersinnaatitaapput.

**§ 6.** Siusinaartumik pensionisiat inunntut timimikkut imaluunniit eqqarsartaatsimikkut ataavartumik innarlerneqarsimasunut pisartagarilersinneqarsinnaapput.

**§ 7.** Tamakkiisuusumik siusinaartumik pensionisiaqarsinnaatitaassagaanni, piffissami 15-inik ukioqalernermit siusinaartumik pensionisiaqalersinneqarneq sioqqullugu Kalaallit Nunaanni, Danmarkimi Savalimmiuniluunniit sivikinnerpaamik piffissap 5/6-ani najugaqarsimanissaq piumasqaataavoq. Tamakkiisuusumik siusinaartumik pensionisiaqalernissamut piumasqaat eqqortinneqarsimanngippat, siusinaartumik pensionisiat aningaasartaasa amerlassusiat piffissap najugaqarfusimasup aamma 15-inik ukioqalernermit pensionisiaqalersinneqarneq sioqqullugu piffissap 5/6-ia tunngavigalugit aalajangersarneqartassapput.

### *Kalaallit Nunaata, Danmarkip imaluunniit Savalimmiut akornanni kommuninut nuunneq*

**§ 7 a.** Innuttaasoq Kalaallit Nunaanni kommunimiit Danmarkimi imaluunniit Savalimmiuni kommunimut nuuppat, aamma innuttaasoq Inatsisartut inatsisaat una naapertorlugu siusinaartumik pensionisianik pisartagaqarpat, kommune qimanneqartoq paasissutissanik attuumassuteqartunik kommunimi nuuffigisami pensionisianik suliaqarnermi atorineqartussanngorlugit kommunimut nuuffigineqartumut avitseqatiginnissaaq.

*Imm. 2.* Suliamut paasissutissat attuumassuteqartut qallunaatumut nutsertinneqarnerannut aningaasartuutit kommunimit qimanneqartumit akilerneqassapput.

**§ 7 b.** Siusinaartumik pensionisianik pisartagaqartoq Kalaallit Nunaanni kommunimiit Danmarkimi imaluunniit Savalimmiuni kommunimut nuuppat, kommunimi nuuffigineqartumi annikinnerpaamik imaluunniit akunnattunik siusinaartumik pensionisianik pisartagaqartup siusinaartumik pensionisiani qaammatit 12-t tikillugit attatiinnarsinnaavai.

*Imm. 2.* Piffissami imm. 1-imi taaneqartumi siusinaartumik pensionisiat akuerineqartut nalilersorneqaqqissanngillat allanngortinneqarlutilluunniit.

*Imm. 3.* Siusinaartumik pensionisianik pisartagaqartoq qaammatit siulliit 12-it iluanni kommunimi nuuffigineqartumi siusinaartumik pensionisianik pisartagaqalernissaminik akuerineqarpat, Kalaallit Nunaanni kommunimit siusinaartumik pensionisiat akuerineqartut atorunnaarsinneqassapput.

*Imm. 4.* § 33-mi, imm. 1 naapertorlugu siusinaartumik pensionisianik pisartagalik kommunimi nuuffigineqartumi siusinaartumik pensionisianik pisartagaqalernissaminik akuerineqaruni, Kalaallit

Nunaanni kommunimut qimanneqartumut nalunaaruteqarnissaminut pisussaaffeqarpoq.

**§ 7 c.** Danmarkimiit siusinaartumik pensionisianik pisartagallit aamma Savalimmiuniit qaffasinnerpaanik siusinaartumik pensionisianik pisartagallit sulisinnaassuseqanngitsut imaluunniit annikitsuinnarmik sulisinnaassusillit nunatsinnut nuukkaangamik Kalaallit Nunaanni kommunimi nuuffigisaminni ingerlaannartumik qaffasinnerpaanik siusinaartumik pensionisianik pisartagaqalersinneqassapput.

### **Kapitali 3**

#### *Qulaajaanermik ingerlatsineq aamma piginnaangorsaaqqiineq*

**§ 8.** Qinnuteqartoq sulisinnaassutsimi ilaanik suli pigisaqaqqilersinnaanersoq paasiumallugu, siusinaartumik pensionisiaqalersitsinissap isummerfiginnginnerani periarfissat suliamut attuumassuteqartut tamarmik misissorneqassapput.

*Imm. 2.* Siusinaartumik pensionisiaqarnissamik qinnuteqartut tamarmik qulaajaaffigineqassapput. Qulaajaanermi qinnuteqartup piginnaasai misissuiffigineqassapput, qinnuteqartullu piginnaangorsaaqqinnermik ingerlataqarnermigut sulisinnaassutsini tamakkerlugu sulisinnaassutsilluunniit ilaa angoqqissinnaaneraa aalajangiivigineqassaaq.

*Imm. 3.* Qulaajaanernut piginnaangorsaaqqinnernulluunniit najuutinnginnermut aamma peqataannginnermut kinguneqartitsinissat pillugit malittarisassanik erseqqinnerusunik Naalakkersuisut aalajangersaasinnaapput.

**§ 9.** Sulisinnaassuseq inuup pineqartup immikkut suliniuteqarfigineqarneratigut ineriartortinneqarsinnaasoq kommunalbestyrelsip qulaajaasoqarneranut atatillugu nalilersimappagu, taava kommunalbestyrelse tamanna pillugu aalajangiissaaq qinnuteqartorlu piginnaangorsaaqqinnissamut innersuullugu.

*Imm. 2.* Inummut ataatsimut naleqqussakkamik piginnaangorsaaqqinnissamik ingerlatsineq aqputigalugu sulisinnaassuseq massakkuugallartuq ineriartortinneqarsinnaanngitsuq kommunalbestyrelsip nalilerpagu, taava paasissutissat tiggummeqareersut tunngavigalugit piginnaangorsaaqqinnermik ingerlatsinerup kinguartinneqarnissaa aamma siusinaartumik pensionisiaqartitsinissaq pillugu kommunalbestyrelse aalajangiissaaq. Piginnaangorsaaqqinnermik ingerlatsinissap kinguartinneqarnissaa pillugu aalajangiinerup kingorna, kingusinnerpaamik ukiup 1-p qaangiunnerani, kommunalbestyrelsip suliaq nalilersoqqissavaa.

*Imm. 3.* Qinnuteqartoq sulisinnaassuseqanngitsuq, piffissamilu ungasinnerusumi sulisinnaassutsiminik ineriartortitsinnaanngitsuq qulaajaanermut atatillugu uppersarsarneqarpat imaluunniit immikkorluinnaq pissutsit takutissinnaapassuk, piginnaangorsaaqqinnissaq ingerlanneqaqqaanngikkaluortoq siusinaartumik pensionisiaqartitsinissaq pillugu kommunalbestyrelse aalajangiissaaq.

### **Kapitali 4**

#### *Siusinaartumik pensionisiaqarnermut maalaaruteqartarfik*

**§ 10.** Sulisinnaassuseq pillugu naliliernerut sumulluunniit attuumassuteqanngitsumik naammagittaalliuutinik qitiusumik suliaqartussanik siusinaartumik pensionisiaqarneq pillugu naammagittaalliuuteqartarfimmik Naalakkersuisut pilersitsissapput.

*Imm. 2.* Siusinaartumik pensionisiaqarneq pillugu naammagittaalliuuteqartarfup suleriaasissaanut naammagittaalliuuteqartarfiullu sulinissaanut, kiffartuussinikkut anguniagassaanut, piffissamilu atuuffiusumi naammagittaalliuuteqartarfup siulittaasuanit innersuussisoqareerneratigut naammagittaalliuuteqartarfup ilaasortaasa soraarsineqartarnissaat pillugit kiisalu naammagittaalliuuteqartarfup ilaasortaanik akissarsisitsisarnissaq pillugu Naalakkersuisut sukumiinerusunik malittarisassanik aalajangersaassapput.

*Imm. 3.* Siusinaartumik pensionisiaqarneq pillugu naammagittaalliuuteqartarfup nammineerluni suleriaasissaminik aalajangersaassaaq.

**§ 11.** Siusinaartumik pensionisiaqartitsisarneq pillugu maalaaruteqartarfik siulittaasoqassaaq inatsisilerituutut ilinniagaqarsimasumik, allanillu marlunnik ilaasortaqaassalluni. Siulittaasoq aammalu ilaasortat ukiut sisamat atuuttussanngorlugit toqqarneqartassapput. Siusinaartumik pensionisiaqartitsisarneq pillugu maalaaruteqartarfup suliffeqarnikkut, isumaginninnikkut, peqqissutsikkut, ilinniartitaanikkut aammalu nakorsaqaarnikkut immikkut ilisimasaqartuussapput. Siusinaartumik pensionisiaqartitsisarneq pillugu maalaaruteqartarfimmi ilaasortat inuttut suliffeqarnikkullu immikkut ilisimasatik toqqammavigalugit toqqarneqartassapput.

## **Kapitali 5**

*Sulisinnaaneq pillugu sulisinnaassutsillu nalileqqinneranik, uppersaasiineq aalajangiinerlu*

*Sulisinnaassutsimik nalilersuineq*

**§ 12.** Qinnuteqaateqartup sulisinnaassusaa nalilersuiffigeriarlugu pineqartup tamakkiisumik sulisinnaassusiata procentia naatsorsorneqartassaaq.

*Sulisinnaassutsip nalilersoqqinneqarnera*

**§ 13.** Siusinaartumik pensionisiallit 60-it inorlugit ukiullit, sulisinnaassusiat ukiut tallimakkaarlugit nalilersuiffigineqaqqinneqartassapput.

*Imm. 2.* Siusinaartumik pensionisiaqartitsinermi akissaatit allanngortinneqaratik ingerlatiinnarneqassapput, tamatumani naliliffigineqarsimappat pineqartup sulisinnaassusia allannguuteqarsimanani siusinaartumik pensionisiaqarnissamat tunngavigineqarsimasut allannguuteqarsimangippata.

*Imm. 3.* Nalilerneqarsimappat innuttaasup sulisinnaassusia malunnaateqarluartumik allannguuteqarsimasoq, taava siusinaartumik pensionisiaqartitsisarnermi pisartagaritinneqartut annikillisillugilluunniit qaffasinnerusunngorlugit aaqqiivigineqarsinnaapput.

*Imm. 4.* Nalilerneqarsimappat innuttaasup siusinaartumik pensionisiaqartinneqarnissaminut piunasaqaatigineqartut naammassisinnaajunnaarsimagai, taava siusinaartumik pensionisiaqartitsisarneq unitsinneqassaaq.

*Imm. 5.* Innuttaasoq § 9 imm. 3-mut pineqartunut ilaappat, sulisinnaassutsip naliliiffigineqaqqinnissaa pinngitsoorneqarsinnaavoq.

*Imm. 6.* Sulisinnaassuseq pillugu isumasiuinissamik aamma sulisinnaassutsip procentikkaartumik aalajangiivigineqarnissaanut tunngavissanik, sulisinnaassutsillu nalilerneqarnissaanut nalilersoqqinneqartarnissaanullu Naalakkersuisut malittarisassanik ersarinnerusunik aalajangersaassapput.

#### *Uppernarsaatit aalajangiinerlu*

**§ 14.** Piginnaanngorsaareernerup naammassereernerani §§ 12 aamma 13 naapertorlugu sulisinnaassutsip naliiffigineqarnera nalilersoqqinneqarneralu kommunalbestyrelsimit suliarineqassaaq, taamaattoq tak. § 9.

*Imm. 2.* Kommunalbestyrelsi makku tunulequtaralugit aalajangiissaaq:

- 1) Nassuiaat, pineqartup piginnaasai ilinniagaqarnerup suliaqarnerullu tungaatigut piginnaasaanik unammilligassaanillu allaatigisaqartoq kiisalu pineqartup sulisinnaassusaa pillugu ineriartortitsinissaaq annertusaanissarlu suliniutinik kommunalbestyrelsi aallarnisaasimappat allaatiginnittumik.
- 2) Nassuiaat, pineqartup sulisinnaassusaata ataavartumik annikillisimaneranik sunik tunngaveqarnerasoq allaatiginnittumik.

*Imm. 3.* Suut uppernarsaatissatut tunngavigineqassanersut pillugit Naalakkersuisut malittarisassanik ersarinnerusunik aalajangersaasinnaapput.

### **Kapitali 6**

#### *Pensionisiaqartitsinerit annertussusaat*

**§ 15.** Siusinaartumik pensionisiaqartitsisoq annikinnerpaamik pisartagarineqarsinnaasoq, qinnuteqaateqartut sulisinnaanera 51%-imiit 75% tikillugu annertussuseqarsimassappat.

*Imm. 2.* Imm. 1 naapertorlugu siusinaartumik pensionisiassat annikinnerpaat ukiumut tassaapput § 17, imm. 2 naapertorlugu siusinaartumik pensionisiat annerpaartaasa affaat.

*Imm. 3.* Siusinaartumik pensionisiaqarnermi pisartakkat appartinneqassapput, siusinaartumik pensionisiaqartoq aammalu taassuma aapparisaata ukiumoortumik isertitarisaat, tamatumani ilanngunnagit siusinaartumik pensionisiat, utoqqalinermi pensionisiat aammalu Nunani Avannarliit akornanni isumaginninnikkut lsumaqaatigiissut naapertorlugu 38.000 kr.-it sinnerpatigut ilanngullugit § 17, imm. 2 naapertorlugu siusinaartumik pensionisiat annertunerpaat affaatut tunniunneqartartut.

*Imm. 4.* Siusinaartumik pensionisiat annikinnerpaat §§ 20 aamma 21 naapertorlugit isertitatigut tunngaviit affaannik ikilisinneqassapput, § 17, imm. 2 naapertorlugu siusinaartumik pensionisiat annerpaartaasa affaat ilanngullugit 38.000 kr.-it ilanngaatalugit.

**§ 16.** Akunnattumik siusinaartumik pensionisiaqartitsisoqassaaq qinnuteqaateqartup sulisinnaassusia 26%-ip 50%-illu akornanni annertussusilerneqarsimappat.

*Imm. 2.* Imm. 1 naapertorlugu siusinaartumik pensionisiat akunnaatsumik annertussusillit ukiumut tassaapput § 17, imm. 2 naapertorlugu siusinaartumik pensionisiat annerpaartaasa 2/3-ii.

*Imm. 3.* Siusinaartumik sulisinnaajunnaarnersiutit appartinneqassapput siusinaartumik sulisinnaajunnaarnersiuteqartoq ukiumoortumik isertitai, tamatumani ilanngunnagit siusinaartumik sulisinnaajunnaarnersiutit aamma pensionisiat Nunani Avannarliit akornanni isumaginninnikkut lsumaqaatigiissut naapertorlugu 38.000 kr.-it sinnerpagit ilanngullugit § 17, imm. 2 naapertorlugu siusinaartumik sulisinnaajunnaarnersiutit annertunerpaat pingasorarterutaatut tunniunneqartartut.

*Imm. 4.* Siusinaartumik pensionisiat akunnattumik annertussusillit §§ 20 aamma 21 naapertorlugit 2/3-nik ilanngarneqassapput, § 17, imm. 2 naapertorlugu siusinaartumik pensionisiat annerpaartaasa pingajorarterutaannik ilallugit 38.000 kr.-inik ilanngarlugit.

**§ 17.** Qaffasinnerpaamik siusinaartumik pensionisiaqartinneqassapput, innuttaasut 0 – 25%-ip akornanni sulisinnaassuseqartut.

*Imm. 2.* Siusinaartumik pensionisiat qaffasinnerpaat piffissami 1. juli 2022-miit 31. december 2022 ilanngullugu ukiumut 126.951 kr.-it angullugit annertussuseqarput. Tamatuma kingorna siusinaartumik pensionisiat qaffasinnerpaat ulloq 1. januar 2023 aallarnerfigalugu ukiumut 129.870 kr.-it angullugit annertussuseqarput.

*Imm. 3.* Siusinaartumik pensionisiat apparneqassapput siusinaartumik pensionisiaqartup ukiumut ataatsimut piffissami pineqartumi isertitaat siusinaartumik pensionisiat, pensionisiat Nunani Avannarlerni isumaginninnikkut sillimmasiisarnernik aqqiissuussinerit naapertorlugit 38.000 kr.-it qaangersimagaangatigit.

*Imm. 4.* Siusinaartumik pensionisiallip sulisinnaassusia nalilersuiffigineqaaqqissaq, pineqartup pensionisiat saniatigit 80.000 kr.-inik isertitaqarsimassappat. Qaffasinnerpaamik pensionisiaqarnera allanngortinneqassanngilaq pineqartup sulisinnaassusianik nalilersuiffigineqarnerani.

*Imm. 5.* §§ 20 aamma 21-ni taaneqartutut qaffasinnerpaamik pensionisiat 100 %-imik appartinneqassapput, isertitatigit toqqammaviusut 38.000 kr.-inik ilanngarlugit qaffasinnerusimassappata.

**§ 18.** Procenti aaqqiissutissaq Kalaallit Nunaanni Naatsorsueqqaartarfup naatsorsugaa tunngavigalugu § 17, imm. 2 malillugu siusinaartumik pensionisiat amerlassusissaat aaqqiivigineqartassapput. Siusinaartumik pensionisiat qaammatini aqqaneq-marlunni kingullerni procentimut aaqqiissutissamut allannguutissatut naatsorsorneqartoq 1. julimeersoq tunngavigalugu aaqqiivigineqartassapput. Ukiumut ataasiarluni 1. januar aallarnerfigalugu atuuttussatut aaqqiisoqartassaaq.

*Imm. 2.* Akit il.il. pillugit nalilersuinerit annertussusaat 1. januarimiit toqqammavigineqalersussat pillugit Naalakkersuisut avammut nalunaaruteqartassapput.

**§ 19.** § 17 naapertorlugu qaffasinnerpaamik siusinaartumik pensionisiaqartitsineq immikkut pisoqartillugu, naleqquttumik akissarsiaqarfusumik suliffeqalernissamut piffissami ikaarsaarfusumi, akuersissutigineqarsinnaavoq sivilunerpaamik ukiut ataasiakkaarlugit, naak siusinaartumik pensionisiaqartoq sulisinnaassutsimigut qaffasinnerpaamik siusinaartumik pensionisiaqarnissamut pisinnaatitsinngikkaluartoq. Tamanna immikkut pissutsini atuutissaaq najugaqarfigisami naleqquttumik akissarsiaqarfusumik siusinaartumik pensionisiaqartoq suliffissaqartinneqanngippat. Siusinaartumik

pensionisiaqartoq naleqquttumik suliffissarsisinnaanissaa imaluunniit suliffimmik naleqquttumik pilersitsinissaq ingerlaavartumik periarfissarsiuussissalluni kommunalbestyrelsip pisussaaffigaa.

*Imm. 2.* Suliffeqarnissamut periarfissaqartillugu kommunalbestyrelsi innersuussisassaaq. Siusinaartumik pensionisiaqartoq suliffimmuut innersuunneqartumut suliffik tulluurtuutillugu tiguisussaatitaavoq.

*Imm. 3.* Qaffasinnerpaamik siusinaartumik pensionisiaqartitsineq atorunnaassaaq qaffasinnerpaamik siusinaartumik pensionisiaqartitsinnermut aallaqqaammut piumasaqaataasut eqquutsinneqarunnaarpata imaluunniit imm. 2 naapertorlugu suliffimmuut innersuunneqartumut siusinaartumik pensionisiaqartoq itigartitsippat.

*Imm. 4.* Qaagukkut suliffik tulluurtuunersoq pillugu Naalakkersuisut malittarisassanik ersarinnerusunik aalajangersaasinnaapput.

## **Kapitali 7**

*Pensionit aningaasartaasa nalimmassartarneri, tunniussisarneq il.il.*

*Pensionit aningaasartaasa nalimmassartarneri*

**§ 20.** Siusinaartumik pensionisiat ukiut tamaasa 1. januaarimi aaqqiivigineqartassapput, tak. §§ 15-18.

*Imm. 2.* Siusinaartumik pensionisiat ataavartumik aaqqiivigineqartassapput isertarisat annertuumik allannguuteqarsimappata, tak. §§ 15-17. Allannguutit atuutilersinneqassapput isertitat allanngorneraniit qaammatip tulluuttumi aallaqqaataanniit atuutilersuimik.

*Imm. 3.* Siusinaartumik pensionisiat tunniunneqartalernerannit aammalu piffissami isertitarisat annertuumik allannguuteqarsimatillugit, siusinaartumik pensionisiat naatsorsorneqassapput isertitariligassatut naatsorsuutigineqartut toqqammavigalugit.

**§ 21.** Siusinaartumik pensionisiaqartoq qitornartaarsimalluni sulinngiffeqarnermut atatillugu isertitami ilaanik annaasaqarpat, siusinaartumik pensionisiat piffissami sulinngiffeqarfiusumut nalimmassarneqassapput.

*Paaqqinnittarfinni il.il. inissisimagallarneq*

**§ 22.** Siusinaartumik pensionisiaqartoq paaqqinnittarfimmuut il.il. angerlarsimaffiup avataanut inissinneqarallarpata tassanilu najugaqarneq pisortanit akilersorneqarpat, aamma siusinaartumik pensionisiaqartoq pilersuisussaatitaaffeqarpat imaluunniit angerlarsimaffimmuut aningaasartuuteqarpat, siusinaartumik pensionisiat allannguuteqassanngillat.

*Paaqqinnittarfinnut il.il. sivilunerusumik inissinneqarneq*

**§ 23.** Angerlarsimaffiup avataanut paaqqinnittarfimmuut il.il. sivilunerusumik inissiisoqartillugu tassanilu najugaqarneq pisortanit akilersorneqarpat, qaammammi nuuffusumi aamma qaammammi tulluuttumi siusinaartumik pensionisiat allannguuteqassanngillat, tamatumalu kingorna siusinaartumik pensionisiat qaffasinnerpaaffisa 20 pct-ii tunniunneqartassapput.

*Paaqqinnittarfimmiinnermi tapit il.il.*

**§ 24.** Siusinaartumik pensionisiaqartoq inissinneqartoq, tak. §§ 22-23, pissutsit ataasiakkaat nalilersuiffigineratigut inuttut tapeqartinneqarsinnaavoq. Meeqqanut tapisiaqartoqartillugu taakkununga pisinnaatitaaffik allannguuteqassanngilaq.

*Imm. 2.* Siusinaartumik pensionisiaqartoq angerlarsimaffigisami avataani inissisimajunnaarpat, qaammatip tulliuttup aallaqqaataa aallarnerfigalugu siusinaartumik pensionisiat tunniunneqartarneri nanginneqassapput, tak. § 23.

*Ilanngaassisarneq aamma nammineq akiliisarneq*

**§ 25.** Angerlarsimaffiup avataani inissisimanermi siusinaartumik pensionisianik tunniussisarneq pillugu, ilaatigut paaqqinnittarfinni il.il. inissisimanermi siusinaartumik pensionisianik ilanngaassisarneq pillugu, kiisalu isumaginninnermi ulloq unnuarlu angerlarsimaffimmi inissinneqarnermi nammineq isertitaqarneq pissutigalugu akiliisarneq ilanngullugu Naalackersuisut malittarisassanik ersarinnerusumik aalajangersaassapput.

**Kapitali 8**

*Tapisiat*

*Meeqqanut tapit*

**§ 26.** Siusinaartumik pensionisiallit meeqqanut 18-it inorlugit ukiulinnut pilersuisussaataasut meeqqat ataasiakkaarlugit tapisiaqaatigissavaat. Tapiutit tapiutigineqartassapput pilersuisussaataaneq toqqaannartumik pilersuinerunersoq imaluunniit meeqqanut akilersuutininik akiliisarnikkut eqquutsinneqarnerisoq apeqqutaatinnagu.

*Imm. 2.* Pilersuisussaataaneq meeqqanut akilersuutininik akiliinikkut eqquutsinneqarpat, aningaasat meeqqanik akilersuutininik tigusinnaatitaasumut il.il. meeqqanut kiisalu qitornavissiarthaarnermi tapinut Inatsisartut peqqussutaanni malittarisassat naapertorlugit tunniunneqartassapput.

*Imm. 3.* Meeqqanut tapit siusinaartumik pensionisiaqartunut nunattalu avataanut nunassissimasunut tunniunneqartussaannngillat.

**§ 27.** Meeqqanut tapit tunniunneqartarunnaassapput kinguliini patsisissaataasoq ataaseq arlallilluunniit eqquutsinneqarpata:

- 1) Meeqqanik inuusuttunillu ikiorsiisarneq pillugu Inatsisartut peqqussutaat malillugu meeraq angerlarsimaffiup avataanut inissinneqarsimappat imaluunniit pisortanik tamakkiisumik pilersorneqarpat,
- 2) Meerarineqartoq ilinniagaqarnerisutisiaqarpat, matumani aamma sulilluni sungiusarnerup nalaani tamatumunnga malittarisassat malillugit pisartagaqarpat,
- 3) Meerarineqartoq aapparminut, nalunaarsukkamik aapparminut meeqqamulluunniit nammineq pilersuisussaataalerpat.

§ 28. Meeqqamut tapeq nalinginnaasumik meeqqanut tapip agguarneratigut naatsorsorneqarsimasooq qaammatikkaartumik ukiumoortumik aningaasanut inatsimmi aalajangiiffigineqarsimanera toqqammavigalugit tunniunneqartassaaq, takuulli imm. 3.

*Imm. 2.* Pilersuisut tamarmik siusinaartumik pensionisiaqartuusimappata, siusinaartumik pensionisialinnut tamanut meeqqamut ataatsimut tapisiaq ataaseq tunniunneqartassaaq.

*Imm. 3.* Siusinaartumik pensionisiaqartoq meeqqamut tapimik akiliisussanngortitaasimappat, allatut isikkoqartumik akiliuteqartarnissaq isumaqatigiissutigineqarsimanngippat ukiup affakkaartumik tapisiaq tunniunneqartassaaq.

*Imm. 4.* Meeraq pineqartoq siusinaartumik pensionisialimmi najugaqarsimassanngippat, aammalu siusinaartumik pensionisialik akiliuteqartarnissamut pisussaaffilerneqarsimappat, meeqqamut tapeq inersimasumut akisussaatinneqartumut tunniunneqartassaaq.

### *Inummut tapit*

§ 29. Inummut tapit kommunalbestyrelsimit akuersissutigineqartarput inuit ataasiakkaat pisariaqartitaat nalilersuiffigineqareernerisigut soorlu imaattut:

1) eller ingerlaavartumik pisartakkatut sivilunerpaamik ukiumut ataasiakkaarlugit aalajangersarneqartunik, imaluunniit

2) immikkut pisariaqartitat matussuserniarlugit ataasiarluni ikiorneqarneq, ilaatigut makkununga:

a) isarussat,

b) atisat,

c) pequtit,

d) Kalaallit Nunaata iluani angalanermut aningaasartuutit naleqquttut, aamma

e) ataasiaannarluni aningaasartuutit allat pisariaqartutut naatsorsuutigineqartut.

*Imm. 2.* Kalaallit Nunaata avataanut angalanerit ataasiartumik ikiorsiissutitut tunniunneqarsinnaanngillat.

*Imm. 3.* Inuttut tapit utertillugit akileqquneqarsinnaapput:

1) illersorneqarsinnaanngitsumik aningaasanik aqutsinerlunneq pissutigalugu inuttut tapit tunniunneqarpata, imaluunniit

2) siusinaartumik pensionisiaqartoq inuttut tapinik pisartagaqartoq kingusinnerusukkat aningaasanik piffissamut pineqartumut inuttut tapinik assinganik siunertaqartumik pissarsisimappat.

*Imm. 4.* Utertillugit akileeqqusineq aatsaat piumasarineqarsinnaavoq siusinaartumik pensionisiaqartumut tapinik aningaasaliissuteqarnermut atatillugu utertitsisussaataitanermik ilisimatitsisoqarsimappat.

*Imm. 5.* Siusinaartumik pensionisiaqartumut Kalaallit Nunaata avataani aalajangersimasumik najugaqartumut inuttut tapit tunniunneqassanngillat.

*Imm. 6.* Inuttut tapit pillugit Naalakkersuisut malittarisassanik ersarinnerusunik aalajangersaasinnaapput.

## **Kapitali 9**

### *Allaffissorneq*

§ 30. Inuit Kalaallit Nunaanni najugallit siusinaartumik pensionisianik, meeqqanut tapinik inuttullu tapinik qinnuteqaat kommunalbestyrelsimit tunniutissavaat. Inuit kommuneqarfiit killilersugaanerisa avataanni

najugallit siusinaartumik pensionisianik, meeqqanut tapinik inuttullu tapinik qinnuteqaat Naalakkersuisunut tunniutissavaat

*Imm. 2.* Isumaginninnikkut isumannaallisaaneq pillugu Nunat Avannarliit isumaqatigiissutaat naapertorlugu siusinaartumik pensionisianik qinnuteqaat Naalakkersuisunut tunniunneqassaaq.

*Imm. 3.* Inuup nammineerluni qinnuteqarsimangitsup siusinaartumik pensionisiat pillugit kommunalbestyrelsi suliassamik aallartitsinnaallunilu aalajangiisinaavoq.

**§ 31.** Siusinaartumik pensionisiliaqalernissamik pisinnaatitaaffeqalernerq pissaaq piumasaqaatit naammassineqareerpata aamma kommunalbestyrelsi siusinaartumik pensionisiaqalernissamik qinnuteqaammut akuersaartumik aalajangeereernerata kingorna qaammatip aallaqqaataani.

**§ 32.** Inuit siusinaartumik pensionisiallit qinnuteqaqqaanngikkaluarlutik utoqqalinermi pensionisianik pisartagaqalissapput utoqqalinermi pensionisiaqalersinnaaneq naak taakkuninnga pisartagaqartinneqarnissaq qinnutiginnngikkaluarlugu angusimagunikku, inatsit manna tunngavigalugu pisartagarineqartut tamarmik ingerlaannartumik unitsinneqassapput.

## **Kapitali 10**

*Paasissutissiisussaataaneq, siusinaartumik pensionisiat atorunnaarsinneqarnerat misissuinissamullu pisinnaatitaaffik*

**§ 33.** Siusinaartumik pensionisiallip kommuni imaluunniit Naalakkersuisut ilisimatittussaavai isertitatigut atugarisani allannguuteqarsimappata imaluunniit aningaasaqarniarnermi toqqammavigisat allannguuteqarsimappata, imatut paasillugu pisartagaqarsinnaanermut toqqammaviusut nalilersoqqinneqarnissaat pisariaqalersimasoq, soorlu pisartakkat unitsikkallartussanngortinneqarnerannik atorunnaarsinneqarnerannilluunniit kinguneqarsimasinnaallutik.

*Imm. 2.* Siusinaartumik pensionisiat tunniunneqartarnerat unitsinneqassaaq, pisartagaqartitsinermit toqqammaviusut atorunnaarsimassappata.

*Imm. 3.* Siusinaartumik pensionisiaqartinneqartup paasissutissiisussaataaneq sumiginnarsimaguniuk imm. 1 malillugu ilisimaarinninnini imaluunniit ilisimaarinnittariaqarnini naapertorlugu, eqqunngitsumik tunngaveqarluni siusinaartumik pensionisiasanik pissarsisarsimaguni, taava eqqunngitsumik tunngaveqarluni pissarsiarisimasani utertittussanngussavai. Tamatuma saniatigut kommunalbestyrelse pisinnaatitaavoq ingerlaavartumik pensionisarineqartunit allaninngaanniit matussusiissalluni, tamatumanili pineqaratik meeqqanut tapisiat.

**§ 34.** Siusinaartumik pensionisiat akilerneqarnissaannut nakkutilliinermik ingerlatsissalluni kommunalbestyrelsi pisussaaffeqarpoq, taamattaarlu inuit siusinaartumik pensionisianik pissarsinissamut pisinnaatitaaffeqanngitsut tunineqannginnissaannut nakkutilliisussaataalluni.

## **Kapitali 11**

*Tunniussaqaarneq*

§ 35. Siusinaartumik pensionisiat tapiusinnaasullu tunniunneqartassapput qaammatikkaartumik siumoortumik.

§ 36. Kommunalbestyrelsip nalilerpagu siusinaartumik pensionisiaqartoq nammineq aningaasaatiminik aqutsisinnaanngitsoq, aalajangiisoqarsinnaavoq siusinaarluni pensionisiat tunniunneqartarnerinik aqutsisoqarnissaa, uani ilaallutik inummut namminermut tapit aamma meeqqanut tapit tunniunneqarneri. Taamatut aalajangiinerup nassataraa, kommunalbestyrelsi aalajangiisinnaasoq inunnut ataasiakkaat pensionisiat tunniunneqartarnerannut atatillugu nalinginnaasumik maleruagassat ileqqullu atorneqartut avaqqullugit tunniussisarnissaminut, taamaasiornikkullu qulakkeerniarneqassasoq siusinaartumik pensionisiaqartup inuuniarnermini aalajangersimasumik akilertakkani akilertarlugillu saniatigut inuussutissaqarnissaminut akissaqartassasoq.

§ 37. Siusinaartumik pensionisiaqarnissamut piumasaqaataasut eqqortinneqarunnaarpata pisartagaqartitsineq qaammatip tulliuuttup naaneraniit unitsinneqarnissaa kommunalbestyrelsimit aalajangiiffiqineqassaaq. Tunniunneqartartunilli unitsitsineq, Kalaallit Nunaat qimallugu nuunnermi qaammatip nuuffiusup naanerani pisassaaq, tak. § 7 b, taamaattorli nunani avannarlerni nunamut allamut imaluunniit nunamut allamut EØS-imik isumaqatigiisummut atasumut piumasaqaatinik nuunnermi eqquutsitsisoqarsimappat unitsinneqassanngillat.

*Imm. 2.* Siusinaartumik pensionisiallip maqaasineqarluni nalunaarutigineqarneraniit qaammatit pingasut qaangiunneranni uumaneralu uppersararneqarsinnaanngippat pisartagaqartitsineq qaammatip tulliuup aallaqqaataanit unitsinneqassaaq. Siusinaartumik pensionisiaqarneq atuukkunnaassaaq, siusinaartumik pensionisiaqarnerup unitsinneqarneraniit ukiup ataatsip qaangiunnerani siusinaartumik pensionisialik suli uumanersoq uppersararneqarsinnaanngippat. Taamatut pisoqarsimatillugu siusinaartumik pensionisiassat unitsitsigallarnerup nalaani pineqartussaagaluit tunniunneqanngitsoornissaat.

*Imm. 3.* Siusinaartumik pensionisiallip toqukkut qimagunneranut atatillugu aappaqarsimappat aapparisimasaanut siusinaartumik pensionisiat qammammi toqukkut qimaguffiusup naaneraniit qaammatit marluk tunniunneqassapput.

## **Kapitali 12**

### *Ilanngaasiisinnaatitaaneq*

§ 38. Siusinaartumik pensionisiat akiligassanut allatulluunniit pinngitsaalisaaqumik akiliisitsiniarnermi pisortanut akiligassaqartoqartillugu taamaallaat attuumassuserneqarsinnaapput.

## **Kapitali 13**

### *Naamagittaalliuteqarsinnaaneq*

§ 39. Inatsisartut Inatsisaat manna toqqammavigalugu kommunalbestyrelsimit aalajangiisimanerit inatsisartut peqqussutaat Inunnik Isumaginninnerup aqunneqarnera aqqissuusaaneralu pillugit aalajangersakkat naapertorlugit Isumaginninnermi Maalaaruteqartarfimmut suliassanngortinneqarsinnaapput, taamaattorli takuuk imm. 2.

*Imm. 2.* §§ 12 aamma 13 malillugit sulisinnaassutsip naliliiffigineratigut naliliiffigeqqinneratigullu sulisinnaassutsimut procentip aalajangersaaffigineqarnera pillugu kommunalbestyrelsip aalajangiineri Siusinaartumik pensionisiaqarnermut maalaaruteqartarfimmut maalaarutigineqarsinnaapput. Aalajangiinermiit sapaatit akunnerisa 6 iluanni maalaarut Siusinaartumik pensionisiaqarnermut maalaaruteqartarfimmut tunniunneqassaaq.

*Imm. 3.* Siusinaartumik pensionisiaqartitsineq pillugu sulisinnaassutsip nalilerneqarneranut aamma pissutsit allat pillugit maalaarut imaqartoq, aallaaviatigut Siusinaartumik pensionisiaqarnermut maalaaruteqartarfimmit suliarineqassaaq.

*Imm. 4.* Siusinaartumik pensionisiaqartitsarneq pillugu maalaaruteqartarfimmit aalajangikkat, ingerlatsiveqarfimmut allanut suliassanngorteqqinneqarsinnaanngillat.

## **Kapitali 14**

### *Aningaasalersuineq naatsorsuuserinerlu*

**§ 40.** Siusinaartumik pensionisianut, meeqqat tapiinut inuttullu tapinut aningaasartuutit kommuninit tamakkiisumik akilerneqartassapput, takuuk § 44.

*Imm. 2.* Siusinaartumik pensionisiallit kommunit agguataarnerisa avataani aalajangersimasumik najugaqartut pensionisiaannut, meeqqanut tapisiaannut inummullu tapisiaannut aningaasartuutit Nunatta Karsianit akilerneqartassapput.

*Imm. 3.* Siusinaartumik pensionisialinnut Kalaallit Nunaata, Danmarkip Savalimmiulluunniit avataanni aalajangersimasumik najugaqartunut, siusinaartumik pensionisianut aningaasartuutit Nunatta karsianit akilerneqartassapput.

*Imm. 4.* Inatsisartut peqqussutaannik aqutsinermut aningaasartuutit oqartussaasutut akisussaasumit akilerneqartassapput.

**§ 41.** Qaammatit ukiup naanerata kingorna kingusinnerpaamik kvartalip siulliup qaangiunneraniit qaammatip ataatsip qanngiutinnginnerani kommunimi siusinaartumik pensionisianik pisartagaqartut pillugit kisitsisitigut paasissutissat kommunalbestyrelsip Naalakkersuisunut nalunaarutigissavai.

*Imm. 2.* Paasissutissat nalunaarutigineqartussat imarisassaasat ilusilersorneqarnissaallu pillugit malittarisassat Naalakkersuisunit aalajangersarneqassapput.

## **Kapitali 15**

### *Atuutilersitsinermi ikaarsaariarnermilu aalajangersakkat*

**§ 42.** Inatsisartut inatsisaat 1. juli 2016 atuutilerpoq.

*Imm. 2.* Peqatigisaanik siusinaartumik pensionisiat pillugit Inatsisartut peqqussutaat nr. 4, 7. maj 2007-imeersoq aamma Siusinaartumik pensionisiat pillugit Namminersornerullutik Oqartussat nalunaarutaat nr. 13, 27. juni 2007-imeersoq atorunnaarsinneqassapput.

**§ 43.** Siusinaartumik pensionisialik inatsisip atuutsilernerani 60-nik ukioqalereersimangitsoq, ukiut 5-t qaangiutsinnagit Inatsisartut inatsisaat manna toqqammavigalugu sulisinnaassutsiminnik naliliiffigineqartussaapput. Siusinaartumik pensionisialik inatsisip matuma atuutsilernerani 60-nik

ukioqalereersimasooq imaluunniit § 9 imm. 3-naapertorlugu naliliiffigineqarsimaguni, nammineq aalajangiiffiginnaavaa ilumut sulisinnaassutsini pillugu nalilersitsikkusunerluni.

*Imm. 2.* Siusinaartumik pensionisialik inatsisip atuutilerneraniit ukiut 5-t ingerlanerini sulisinnaassutsiminik nalilersuiffigineqarnikuunngitsoq, tak. imm. 1, ukiuni tulliuttuni siusinaartumik pensionisiaqarnermi pensionisianik qaffasinnerpaanik pisartagaqartinneqassaaq.

*Imm. 3.* Siusinaartumik pensionisialik inatsisip atuutilernerani 60-nik ukioqalereersimasooq, imaluunniit § 9, imm. 3 naapertorlugu inissisimasuusimasooq, § 17 naapertorlugu siusinaartumik qaffasinnerpaanik pensionisiaqaannassooq tamatumani kr. 80.000-it sinnerlugit saniatigut isertitaqarsimangikkuni aammalu nammineerluni sulisinnaassutsini pillugu nalilersuiffigitinnissani kissaatigisimangikkuniuk.

*Imm. 4.* Siusinaartumik pensionisiallit inatsisip atuutilernerani suli 60-nik ukioqalersimangitsut, sulisinaanertik pillugu nalilersuiffigineqarsimangitsut siusinaartumik pensionisiaat imannak annertussuseqarput:

- 1) siusinaartumik pensionisialik kisermaaq ukiumut 109.000 kr.
- 2) siusinaartumik pensionisialik aappalik, tamatumaniilu aapparisaq pisortanit pensionisiaqarsimangippat ukiumut 109.000 kr.
- 3) siusinaartumik pensionisialik aammalu inooqatigalugu aapparisaq siusinaartumik pensionisialik ukiumut 81.750 kr.
- 4) siusinaartumik pensionisialik utoqqalinermit pensionisialimmik inooqatigalugu aappalik ukiumut 71.286 kr.

*Imm. 5.* Imm. 4-mi pisartakkat taaneqartut Nunatsinni Naatsorsueqqissaartarfiup pisiassat akii pillugit nalunaarsuisarnera (forbrugerprisindeks) naapertorlugu allannguutai naapertorlugit aaqqiivigineqartassapput. Siusinaartumik pensionisiat 3%-mik aaqqiivigineqartassapput, pisiassanut akit 3%-mik allannguuteqarsimagaangata. Aaqqiissuteqarneq pisassaaq tulliuttumi 1. januar-imiit, tamatumanimi aallaavigineqassammat 1. julimi nioqqutissat akiisa naatsorsorneqarneranni killiffigisaq.

*Imm. 6.* 1. januarimi aqqiissutigineqartussat pillugit Naalakkersuisut avammut nalunaaruteqartassapput.

*Imm. 7.* Siusinaartumik pensionisiat appartinneqassapput siusinaartumik pensionisialik aapparisaaluunniit, saniatigut imak isertitaqarnerat pissutigalugu, tamatumani pineqanngillat Nunani Avannarlerni Isumaginninnikkut sillimmatit pillugit Isumaqatigiissutit:

- 1) Ukiumut 28.000 kr.-nit siusinaartumik pensionisialimmut kisermaamut.
- 2) Aappariinnut ukiumut 42.000 kr.-nit, tamarmik siusinaartumik pensionisiaqarsimappata.
- 3) Aappariinnut 42.000 kr.-nit arlaa siusinaartumik pensionisiaqarsimappat, aappaalu pisortanit pensionisiaqartinneqarsimangippat.
- 4) Aappariinnut 70.000 kr., arlaa siusinaartumik pensionisiaqarsimappat, aappaalu utoqqalinermit pensionisiaqarsimalluni.

*Imm. 8.* Siusinaartumik pensionisiat appaallatsinneqartassapput saniatigut isertitaqarneq apeqqutaatillugu, taavalu tunniunneqartarunnaassallutik isertitarisat ukunanit annertunerulersimassappata:

- 1) Siusinaartumik pensionisialik kisermaaq ukiumut 180.000 kr.-nit.
- 2) Siusinaartumik pensionisiallit aappariit tamarmik siusinaartumik pensionisiallit, 270.000 kr.-nit.
- 3) Siusinaartumik pensionisialik aapparisaalu pisortanit pensionisiaqartinneqanngitsoq, aappariinnut ukiumut 270.000 kr.-nit.

4) Siusinaartumik pensionisialimmut aapparisaat utoqqalinermit pensionisialik, aappariinnut ukiumut 300.000 kr.-nit.

*Imm. 9.* § 17, imm. 2 naapertorlugu, siusinaartumik pensionisiallit, taakku ilagalugit siusinaartumik pensionisiallit Inunnut Isumaginninnikkut isumannaallisaaneq pillugu Nunat Avannarliit isumaqatigiissutaannut ilaasut, siusinaartumik pensionisiat qaffasinnerpaartaasa 20 procentiinik pisassapput, aappaqarsimaguni aapparisaata piffissami pineqartumi isertitarisartagaat tamarmiusut apeqqutaatinnagit.

*Imm. 10.* Naalakkersuisut siusinaartumik pensionisiat pillugit isertitatigut killissarititat qanoq annertutigissanersut aalajangersaavigisassavaat.

*Imm. 11.* Imm. 4-8-mi pisartakkat qummullu killissarititat taaneqartut atorunnaassapput, siusinaartumik pensionisiaqartarnermut nalilersuineq isumannaarneqarsimappat, kingusinnerpaamillu inatsisip atuutilerneraniit ukiut 5-t qaangiunnerisigut.

**§ 44.** Inatsisip atuutilereernerani ukiut tallimat ingerlanerini siusinaartumik pensionisianut meeqqanullu tapiissutinut aningaasartuutit affaat nunatta karsianit affaallu kommunimit § 26 naapertorlugu akilerneqassapput. § 29 naapertorlugu inummut tapinut aningaasartuutit kommunimit akilerneqassapput.

---

Inatsisartut inatsisaat nr. 19, ulloq 28. november 2016-imeersup (Inatsisip kalaallisut oqaasertaani § 31-mik iluarsineq)<sup>[1]</sup> atuutsitsilernissamut aalajangersagaq una imaraa:

## § 2

Inatsisartut inatsisaat atuutilissaaq ulloq 1. decemberi 2016.

---

Inatsisartut inatsisaat nr. 40, 23. november 2017-imeersup (Qaffasinnerpaamik siusinaartumik pensionisianik pisartagaqartunut tunngaviumik pensionisiaqartarnerup atulersinneqarnissaa, siusinaartumik pensionisialinnut kapitali 7-imi ikaarsaarnissami aalajangersakkami pineqartunut 20 pct.-imut malittarisassap atulersinneqaaqqinnissaa, angalanermi aningaasartuutit naleqquttut pillugit § 29, imm. 1-ip erseqqissarneqarnissaa aamma § 33, imm. 3, aamma § 36 inatsisip kalaallisut oqaasertaani naqqiineq)<sup>[2]</sup> atuutsitsilernissamut aalajangersagaq una imaraa:

## § 2

Inatsisartut inatsisaat atuutilissaaq ulloq 1. januar 2018.

---

Inatsisartut inatsisaat nr. 6, 27. november 2018-imeersup (Oqaatsitigut naqqiutit)<sup>[3]</sup> atuutsitsilernissamut aalajangersagaq una imaraa:

## § 2

Inatsisartut inatsisaat atuutilerpoq 1. december 2018.

---

Inatsisartut inatsisaat nr. 28, 28. november 2019-imeersup (Kalaallit Nunaanni, Danmarkimi Savalimmiunilu kommunit akornanni paasissutissanik paarlaasseqatigiittarneq, nuunnermi siusinaartumik pensionisianik qaammatini 12-ini attassiinnarnissaq, ingerlaannartumik qaffasinnerpaanik siusinaartumik pensionisianik pisartagaqalersitsineq)<sup>[4]</sup> atuutsitsilernissamut aalajangersagaq una imaraa:

## § 2

Inatsisartut inatsisaat ulloq 1. januar 2020-mi atuutilissaaq.

---

Inatsisartut inatsisaat nr. 6, 19. november 2020-meersup (Qulaajaanerit, piginnaangorsaqqiinerit, najukkani pissutsit pissutigalugit tapiissuteqartitsigallarnerit aamma Siusinaartumik pensionisiaqarnermut maalaaruteqartarfimmumt maalaaruteqarsinnaaneq pillugu erseqqissaaneq)<sup>[5]</sup> atuutsitsilernissamut aalajangersagaq una imaraa:

## § 2

Inatsisartut inatsisaat atuutilissaaq 1. januar 2021.

---

Inatsisartut inatsisaat nr. 7, 19. november 2021-meersup (Inunnut nungullarsimasunut utoqqalinersiaqalernissamut ukiorititat 65-it, aaqqiinermi tunngaviummik allanngiueq)<sup>[6]</sup> atuutsitsilernissamut aalajangersagaq una imaraa:

## § 3

Inatsisartut inatsisaat manna inatsisartut inatsisaata saqqummiunneqarnerata aqaguani atuutilissaaq, aamma 1. januar 2021-miit atuutilissalluni.

---

Inatsisartut inatsisaata nr. 9, 20. juni 2022-meersup (Utoqqalinersiaqartunut utoqqalinersiat toqqammaviumut qaffanneqarneri, siusinaartumik utoqqalinersiat qaffasinnerpaat qaffanneqarneri aamma ilanngaassinnginnermi aningaasat tigummiinnagassat qaffanneqarneri)<sup>[7]</sup> atuutsitsilernissamut aalajangersagaq una imaraa:

### § 3

Inatsisartut inatsisaat una atortuulissaaq ulloq 1. juli 2022.

---

Inatsisartut inatsisaata nr. 18, 21. novembari 2022-meersup (Siusinaartumik pensionisianik annikinnerpaamik aamma akunnattunik pisartagaqartup aningaasat tigummiinnagassaasa qaffanneqarneri kiisalu siusinaartumik pensionisiat qaffasinnerpaat pillugit inatsisinut periutsit atorlugit iluarsineri)<sup>[8]</sup> atuutsitsilernissamut aalajangersagaq una imaraa:

### § 2

Inatsisartut inatsisaat 1. januar 2023 atuutilerpoq.

---

Inatsisartut inatsisaata nr. 36, 13. juni 2023-meersup (Utoqqalinersialinnut toqqammaviusumik utoqqalinersianik iluarsineq aamma siusinaartumik pensionisianik qaffasinnerpaanik iluarsineq)<sup>[9]</sup> atuutsitsilernissamut aalajangersagaq una imaraa:

### § 3

Inatsisartut inatsisaannik tamanut saqqummiussinerup aqaguani Inatsisartut inatsisaat manna atuutilissaaq, aamma utoqqalinersiaqarnermut siusinaartumillu pensionisiaqarnermut 1. juli 2022-miit sunniuteqalersumik atuutilissalluni.

---

Inatsisartut inatsisaat nr. 70, 20. novemberi 2023-meersoq (Utoqqalinersialinnut siusinaartumillu pensionisialinnut pensioninik naatsorsuinermi pilersuisussaaqatigiinnerup atorunnaarsinneqarnera)<sup>[10]</sup> atuutsitsilernissamut aalajangersagaq una imaraa:

### § 3

Inatsisartut inatsisaat 1. januar 2024 atuutilerpoq.

---

Inatsisartut inatsisaat nr. 55, 25. novemberi 2024-meersoq (Naammagittaalliuuteqartarfiit suleriaasiisa aalajangersarneqartarnerannut maleruagassanik allanngortitsineq)<sup>[11]</sup> atuutsitsilernissamut aalajangersagaq una imaraa:

### § 7

Inatsisartut inatsisaat 1. januar 2025 atuutilerpoq.

---

*Isumaginninnermut, Suliffeqarnermut Nunamullu Namminermut, Naalakkersuisoqarfik, ulloq  
26. april 2025*

**Aka Grønvold (atsiorn.)**  
Naalakkersuisoqarfimmi pisortaagallartog

/Mehdi Shams (atsiorn.)

[1] Inatsimmi allannguut § 31.

[2] Inatsimmi allannguut § 17, imm. 3, § 17, imm. 4, § 29, imm. 1, § 29 imm. 2, § 33, imm. 3, § 36 aamma § 43 imm. 9.

[3] Inatsimmi allannguut § 17, imm. 4, 2. pkt. aamma § 29.

[4] Inatsimmi allannguut Kapitali 2-p qulequtaa, § 7 a, § 7 b, § 7 c aamma § 37, imm. 1, 2. pkt.

[5] Inatsimmi allannguut Kapitali 3, § 13, imm. 5, § 39, imm. 2, § 39, imm. 3, § 43, imm. 1, 2. pkt. aamma § 43, imm. 3.

[6] Inatsimmut allannguut § 18, imm. 1.

[7] Inatsimmi allannguut § 17, imm. 2 aamma § 17, imm. 3.

[8] Inatsimmi allannguut § 15, imm. 3, § 15, imm. 4, § 16, imm. 3, § 16, imm. 4, § 17, imm. 4 aamma § 17, imm. 6.

[9] Inatsimmi allannguut § 17, imm. 2.

[10] Inatsimmi allannguut § 15, imm. 3, § 16, imm. 3, § 17, imm. 3 aamma § 17, imm. 4.

[11] Inatsimmi allannguut § 10, imm. 2 aamma § 10 imm. 3.

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut